

四庫全書

史部

欽定四庫全書

欽定續通志卷五十六

金紀十

哀宗

哀宗皇帝諱守緒初諱守禮又諱寧嘉蘇宣宗第三子也母曰明惠皇后王氏始封遂王授秘書監改樞密使貞祐四年正月己卯立為皇太子仍控制樞密院事賜今名元光二年十二月庚寅宣宗疾已大漸值暮夜近

臣皆出惟前朝貞明夫人鄭氏在側宣宗知其年老可托謂之曰吾病已至此速召皇太子來主後事言絕而崩夫人秘之已而皇后及貴妃龐氏繼至龐氏陰狡多智常以其子守純年長不得立心鞅鞅夫人恐其為變即紿之曰帝方更衣后妃可少休他室也后與妃遂入他室夫人伺其入遽鑰之急召大臣傳遺詔皇太子即皇帝位於柩前壬辰大赦詔以朕述先帝遺意有便于時欲行而未及者悉奉而行之有司有以情破法使人

因遭刑憲者以故入人罪罪之草澤士庶許直言軍國利害

正大元年春正月戊戌朔改元庚子百官始奏事秘書監富察和卓改恒州刺史左司員外郎尼瑪哈華山同知楨州軍州事邠州節度使伊喇瑪納布貢白兔詔曰得賢臣輔佐年穀豐登此上瑞也馬事此為令有司給道里費縱之丁巳詔朝臣議修復河中府廷臣言陝西民方疲敝未堪力役遂止戊午帝始視朝以李蹊為太常

卿權參知政事荆王守純罷判睦親府布薩烏錦罷充  
太行山陵使尊皇后温都氏元妃温都氏皆為皇太后  
以持嘉喀齊塔權樞密副使有男子服麻衣望承天門  
且笑且哭詰之曰吾笑將相無人吾哭金國將亡羣臣  
請寘諸重典帝曰近詔草澤諸人直言雖涉譏訕不坐  
惟君門非笑哭之所杖而遣之三月癸丑葬宣宗皇帝  
於德陵甲寅起復致仕張行信為尚書左丞以延安帥  
臣完顏哈達戰禦有功授金虎符權參知政事行尚書

省事於京兆兼統河東兩路夏四月癸酉以宣宗祔廟  
大赦中外五月癸卯以完顏薩布為平章政事實嘉烏  
紳為尚書右丞李蹊為翰林承旨仍權參政甲辰賜策  
論經義詞賦諸科進士及第詔刑部登聞檢鼓院毋鎖  
閉防護聽有寃者陳訴六月辛卯立妃圖克坦氏為皇

后遣李唐英至宋議和

按伊喇布哈之遣止以諭宋界  
軍民而非以通好朝廷也是時

金不南伐宋即北侵考續通鑑綱目載哀宗  
先遣李唐英至宋議和金史失載茲據補輯又遣伊喇

布哈率兵至光州榜諭宋界軍民更不南伐秋七月已

亥詔諭百官各勤乃職九月伊喇布哈復澤潞冬十月  
戊午夏國遣使來修好十二月乙巳恒州刺史富察和  
卓有罪伏誅改定辟舉縣令法課以六事京東西南陝  
西設大司農司兼採訪公事京師大司農總之左丞張  
行信言先帝詔國內刑不上大夫治以廉恥高琪所定  
職官犯罪的決百餘條乞改依舊制帝不欲彰先帝之  
過畧施行之

二年夏四月辛卯朔恒山公武仙自真定府來奔起復

致仕胥鼎為平章政事行省事于衛州進封英國公甲午以京畿旱遣使慮囚五月丁丑以旱甚責已避正殿減膳赦罪蘇椿自大名來奔詔置之許州秋七月都水富察摩和納以殺人免死除名八月鞏州元帥田瑞反行省軍圍之其母弟實格殺瑞出降赦其罪以為涇州節度使世襲明安冬十月以夏國修好詔中外新軍政改總領為都尉乙亥諭近臣曰宋人輕犯邊界我以輕騎襲之莫其懲創復通好以息民爾夏人從來臣屬我



朝今稱弟以和我尚不以為辱宋果行成尚欲用兵乎  
卿等宜悉朕意伊喇布哈及宋人戰于九州獲馬數千  
殺人千餘而還內族王嘉努故殺鮮于主簿權貴多救  
之者帝曰英王朕兄敢妄撻一人乎朕為人主敢以無  
罪害一人乎族子恃勢殺主簿吾民何賴特命斬之詔  
有司為死節士十有三人立褒忠廟禁宿泗清口巡邊  
官兵毋復擅殺過淮軍民詔趙秉文楊雲翼作龜鏡萬  
年錄

三年春三月詔尚書議省減用度夏四月辛卯親享於  
太廟邠國夫人車經御路過廟前馭者乘馬二婢坐車  
中俱不下詔繫獄杖之辛丑以旱遣官禱于濟瀆己酉  
遣使慮囚五月己未宋兵掠壽州境癸亥永州桃園軍  
失利死者四百人壬申詔諭隩州趙甫等能以土地來  
歸當任使之六月壬子詔諭高麗及遼東行省格棚額  
討反賊萬嘉努赦脅從者秋八月伊喇布哈復曲沃及  
晉安辛卯詔設益政院于內廷以楊雲翼等為益政院

說書官日二人入直備顧問冬十一月庚申議與宋修  
好戊辰又議之己巳宋忠義軍夏全自楚州來歸楚州王  
義深張惠范成進以城降俱封為郡王辛未改楚州為  
平淮府赦諸路從宋及淮楚官吏軍民并其家屬丙子  
夏以兵事方殷來報各停使聘元兵征西夏平中興府  
召陝西行省及總帥完顏額爾克赫舍哩約赫德赴汴  
議兵事詔諭陝西兩省凡戎事三品以下官聽以功過  
賞罰之

四年春正月壬戌增築中京城浚汴城外濠二月布哈  
約赫德復平陽執知府李齊錦獲馬八千三月以銀贖  
平陽擄獲男女分賜官軍者聽自便元兵取德順府節  
度使愛紳攝府判馬肩龍死之元兵復陷平陽巳巳徵  
夏稅二倍夏五月丁丑元遣使來責歲幣

據續通鑑  
綱目增輯

元

兵陷臨洮府總管圖們呼圖克們死之陝西行省進三  
策上策自將出戰中策幸陝州下策棄秦保潼關不從  
六月戊申朔遣前御史大夫完顏哈昭為元議和使元

滅西夏以其主覲歸

按大金國志載興定五年元軍自回鶻往攻西夏西夏國亡考西夏

之亡在宋寶慶三年乃金正大四四年也宋史寶慶三年雖未載夏國之亡而嘉定十四年猶載有夏人復以書來趣會兵是時即金興定五年也則其未亡可知蓋是年元曾伐西夏西夏以兵五萬附元侵金大金國志即誤以為西夏亡月茲據續通鑑綱目所載夏亡年月補錄

秋七月元兵自鳳翔徇

京兆關中大震以師安石為尚書右丞壬辰以中丞烏

克遜布希祭酒費摩阿固岱兼司農卿簽民軍勸率富

民入保城聚兼督秋稅令百姓知避遷之計丁酉赦陝

西東西兩路仍賜今年租八月庚戌詔有司罷遣防備

丁壯修城民夫軍須差發應不急者權停已巳李全自  
益都復入楚州據之遣總帥完顏額爾克元帥慶善努  
守盱眙與全戰於龜山敗績降慶善努為定國軍節度  
使冬十月辛酉詔贈德順府死事愛紳馬肩龍等官以

淮南王爵招李全不受

按李全為宋將在金正大二年作亂焚楚州走據青州正大三年

元兵圍全于青州被圍一年乃降元行省事于山東淮南至是得報其家屬被害于金乃以兵南還據楚州與完顏額爾克等戰于龜山哀宗封全為淮南王不受金史未載其降元與不受金封事于原委未晰據續通鑑綱目附  
識于此十一月丁酉獵于近郊十二月授李蹊參知政

事元兵下商州壬子遣使安撫陝西以牛千頭賜貧民  
五年春正月丁丑親祭三廟庚辰遣知開封府事完顏  
莽伊蘇如元弔慰丙戌議擊盱眙二月癸丑詔有司以  
臨洮總管圖們呼圖克們塑像入褒忠廟錄死節者子  
孫姓名量材官之三月乙酉監察御史烏庫哩布嚕魯  
劾近侍張文壽張仁壽李麟之受饋遺曲赦其罪而出  
之夏四月甲辰朔以御史言三姦不已凡四日不視朝  
辛亥議放還西夏人口六月壬戌以旱赦雜犯死罪以

下秋七月戊子同判睦親府事薩哈連出為中京留守  
行樞密院事八月甲子以博索為尚書右丞延扎舒魯  
權參知政事增築歸德府城行樞密院擬工役數百萬  
詔遣權樞密院判官白華諭以農夫勞苦減其工三之  
二以節制不一併衛州帥府於恒山公府命白華往經  
畫之九月庚寅雨足始種麥冬十二月庚子朔日有食  
之完顏莽伊蘇以奉使不職免死除名壬子以陝西大寒  
賜軍士柴炭銀有差京兆鳳翔府司竹監進竹令分給之



六年春二月丙辰以伊喇布哈權樞密副使耀州刺史  
李興有戰功詔加賞賚以完顏薩布行尚書省事于關  
中召完顏哈達還朝伊喇布哈率完顏陳和尚忠孝軍  
一千騎邠州遣白華馳諭布哈以用兵之意詔都尉  
司步卒及忠孝馬軍屯京西以白華專備軍須三月乙  
亥忠孝軍總領陳和尚大敗元兵于大昌原

據續通鑑綱目作五

年三月事

授定遠大將軍平涼府判官世襲穆昆夏五月隴

州防禦使舒穆魯棟爾進黃鸚鵡詔却之秋七月罷陝

西行省軍中浮費八月伊喇布哈再復澤潞冬十月伊  
喇布哈東還令陳和尚率陝西歸順馬軍屯鈞許元兵  
駐慶陽界詔陝西行省遣使如元軍議和十一月遣使  
選試陝西歸順人得軍二千以藝優者充忠孝軍次充  
和爾和軍十二月詔布哈赫舍哩約赫德完顏額爾克  
救慶陽

七年春正月慶陽圍解命額爾克屯邠州布哈約赫德  
還京北夏五月詔清口所獲宋軍三千人願留者屯許

州欲還者縱遣之秋七月以哈達權樞密副使元軍入

陝西京兆同華之間破南山砦柵六十餘所按七月元軍入陝西

金史未載僅載八月賜陝西死事之孤一除于事原委未悉茲從弘簡錄補輯八月賜陝西死

事之孤鹽引及絹仍量材任使元兵圍武仙於舊衛州冬十月哈達布哈引兵救之圍解帝登承天門犒軍哈達布達並世襲穆昆布哈權參知政事同哈達行省事于闐鄉以備潼關

八年春正月元兵圍鳳翔遣白革瓜爾佳巴喇瑪諭闐

鄉行省進兵哈達布哈以未見機會不行復遣白華諭之使將兵出關以解鳳翔之圍又不行夏四月丁巳朔赦免京西路軍須錢一年旱災州縣差稅從實減貸元兵陷鳳翔府兩行省棄京兆遷居民于河南留慶善努守之陳和尚敗元將蘇布特於倒回谷

按元兵內侵諸將畏縮陳和

尚屢挫其鋒亦足以少張軍威金史失載茲據續通鑑綱目補輯

五月李全妻楊妙真以

全陷沒于宋構浮梁于楚州之北欲以病宋帝以距河南不遠遣哈達布哈屯桃源界激河口以備侵軼因約

宋將趙范趙葵為夾攻之計

從弘簡  
錄增輯

宋八里莊人拒其

主將納哈達布哈詔改八里莊為鎮淮府秋七月宋將

焚浮梁九月丙申慈聖宮皇太后溫都氏崩元兵駐河

中府慶善努棄京兆東還召哈達布哈赴汴議引兵趨

河中府懼不敢行還陝州出師至冷水谷而歸元兵攻

河中府哈達布哈遣元帥王敢率兵萬人救之冬十一

月丁未元兵由峽峯關趨金州樞密院議以逸待勞未

可與戰帝曰自南渡以來二十年矣所在之民破田宅

嚮妻子以養軍今敵至不能逆戰止以自護京城縱存  
何以為國朕思之熟矣存與亡自有天命惟不負吾民  
可也乃詔諸將屯軍襄鄧十二月己未葬明惠皇后元  
兵陷河中府權簽樞密院事草火額爾克死之元師板  
子額爾克提敗卒三千走闐鄉詔哈達布哈率諸軍守  
鄧州楊沃衍陳和尚武仙引兵屯順陽戊辰元兵渡漢  
江而北丙子畢渡哈達布哈將兵禦于禹山之前元兵  
分道趨汴京京師戒嚴是夜二鼓哈達布哈引軍還鄧

州元兵躡其後盡獲其輜重

天興元年

是年本正大九年正月改元開興四月又改元天興

春正月元兵出唐

州元帥完顏兩羅索與戰于襄城敗績走歸汴京遣完顏莽伊蘇等部民丁萬人決河水衛京城癸未置尚書省樞密院于宮中以便召問起前元帥瓜爾佳實倫權昌武軍節度使行元帥府事哈達布哈引軍自鄧州赴汴京乙酉以檢點瓜爾佳薩哈為總帥將布騎三萬巡河渡權近侍局使圖克坦長樂監其軍起近京諸邑軍

家屬五十萬口入京丙戌元兵既定河中由河清縣之  
白坡渡河丁亥長樂薩哈至封邱而還戊子錫默愛實  
上書請斬長樂薩哈以肅軍政不從都尉烏凌阿呼圖  
自潼關入援至偃師聞元兵渡河遂走登封少室山壬  
辰衛州節度使完顏薩尼雅布棄城走歸汴京甲午修  
京城樓櫓及守禦備元兵薄鄭州與白坡兵合元帥馬  
伯堅以城叛降于元防禦使烏凌阿耀珠死之乙未元  
游騎至汴城丁酉元兵及兩省軍戰于鈞州之三峯山



兩省軍大潰哈達陳和尚楊沃衍走鈞州城破皆死之  
樞密副使布哈就執尋亦死武仙走密縣己亥徐州行  
省完顏慶善努引兵入援義勝軍校侯進杜正張興率  
所部叛降于元慶善努入睢州庚子御端門肆赦改元  
開興辛丑潼關守將李平以關叛降于元壬寅扶溝民  
錢大亨李鈞叛殺縣令王浩及其簿尉庚戌許州軍叛  
殺元帥瓜爾佳實倫鈕祜祿全周蘇椿等以城降元二  
月壬子朔慶善努謀走歸德遇元兵完顏烏登力戰而

死慶善努被擒與睢州刺史張文壽皆死之甲寅元兵  
徇臨渙攝縣令張若愚死之戊午元兵次盧氏關陝行  
省總帥兩軍及秦藍帥府軍棄潼關而東與之遇未戰  
而潰行省圖克坦烏登總帥納哈塔和碩敗死完顏重  
喜降于元都尉鄭佃殺都尉苗英以降秦藍總帥府經  
歷商衡死之元兵陷睢州翰林待制馮延登使北來歸  
乙丑元兵攻歸德庚午起復右丞相致仕薩布為左丞相  
括京師軍民二十萬分隸諸帥三月丁亥元兵圍中京

留守薩哈連投水死

按續通鑑綱目載元兵圍洛陽薩哈連以病投水死城中人共推強

伸為府僉事患力備禦元益兵力攻凡三月不援乃退金史于此未載強伸守城事今為附識

甲午命

平章政事博索宿上清宮樞密副使喀齊喀宿大佛寺

以備緩急元遣使來諭降庚子封荆王子額爾克為曹

王議以為質密國公壽以曹王幼請代行不聽壬寅以

尚書左丞李蹊送曹王出質諫議大夫費摩阿固岱太

府監國世榮為講和使戶部侍郎楊愷權參知政事分

軍防守四城置局養無家俘民元兵攻汴城帝出承天

門撫西面將士癸卯帝復出撫東面將士親傳戰傷者  
藥仍賜卮酒出內府金帛器皿以賞戰士乙巳鳳翔府  
砲軍萬戶王阿魯楚喬來歸夏四月丁巳遣戶部侍郎  
楊仁奉金帛詣元兵議和戊午元人許和癸亥復葬明  
惠皇后甲子御端門肆赦改元天興詔內外官民能完  
復州郡者功賞有差出金帛酒炙犒飫軍士減御膳罷  
冗員放宮女釋錮厲王衛紹王二族禁錮乙丑百官初  
起居于隆德殿前丙寅以尚書省兼樞密院事丁卯放

宮女聽以衣裝自隨金珠留犒士卒汴京解嚴步軍始  
出采薪蔬已已建威都尉完顏鄂倫同元使摩多入城  
庚午見元使者于隆德殿辛未開鄭門聽百姓男子出  
入遷民告出城者日以萬數甲戌御承天門大饗將士  
五月乙酉以內族思烈行尚書省于鄧州召援兵丙戌  
拜天子大慶殿詔博索致仕放京城四面軍李辛不奉  
詔戊子裕州鎮防軍將領賀德希率西軍二千人入援  
癸巳楊春入據亳州觀察判官劉均死之辛丑帝御香

閻面責宰相乙丑將相受保城爵賞六月庚戌詔百官  
舉大將衆舉劉益不用癸丑以出師錮門禁飛虎軍二

百人奪封邱門出奔

按是時惟錮門禁故飛虎軍奪門出奔金史載癸丑飛虎軍奪門出

奔甲寅錮門禁于事理未合茲從弘簡錄改輯

乙卯博索開渠于私第丙辰閱

官馬擇瘠者殺以食丁巳豐紳據徐州圖克坦伊都走

宿州庚申塞京城四門以便守禦壬戌國用安入徐州

推豐紳為元帥己巳詔贈完顏陳和尚鎮南軍節度使

立褒忠廟碑辛未復修汴城時有以疫事擅厚利者命

倍征之以助其用甲戌宿州鎮防千戶高拉格李宣殺節度使赫舍哩阿古父子請行省圖克坦伊都主帥事伊都不從率將吏西走遇元軍死之乙亥左丞李蹊送曹王與其子全俱還丁丑恒山公武仙殺士人李汾秋七月辛巳軍士擗登聞鼓乞以劉益為將癸未延扎舒嚕罷以完顏納紳為參知政事甲申飛虎軍申福蔡元檀殺北使唐慶等三十餘人于館詔貫其罪和議遂絕乙酉都人揚言欲殺博索密詔遣衛士護其家丙戌軍

士毀博索別墅丁亥拜天子承天門下出內府及兩宮  
物賜軍士戊子下令招軍辛卯簽民為兵鞏昌民百二  
十人赴援國安用降詔封為兗王行京東等路尚書省  
事賜姓完顏改名用安新軍有撾登聞鼓者杖殺之內  
午完顏思烈武仙鞏昌總帥完顏呼沙呼率諸將自汝  
州入援以喀齊喀為樞密使將兵一萬應之命左丞李  
蹊勸諭出師乃行八月己酉朔喀齊喀屯杏花營又益  
兵五千人進屯中牟故城庚戌發丁壯五千人運糧餉



喀齊喀軍辛亥完顏思烈遇元兵于京水師潰武仙退  
保留山思烈走御寨左監軍任守貞死之喀齊喀棄輜  
重奔至鄭門聚兵乃入甲寅免為庶人籍其家以賜軍  
士降監軍長樂為符寶郎戊午括民間粟已未籍圖克  
坦烏登完顏重喜納哈塔和碩家貲前儀封令魏璠上  
言鞏昌帥完顏仲德沉毅有遠謀臣請奉命往召不報  
戊辰起復侯摯為平章政事行京都路尚書省事己巳  
摯率兵行至封丘將士將潰摯止之乃與衆還汴丙子

詔罷括粟丁丑京城民楊興劉仲溫以入貲授官九月  
戊寅朔詔減親衛軍已丑軍士殺鄭門守者以出庚辰  
起張開及王義深范成為元帥完顏哈昭權參知政事  
乙未召民賣放下年軍須錢上戶田租如之閏月戊申  
朔遣使以玉魚帶弓矢賜完王用安其父母妻皆贈封  
之又以世襲宣命十郡王宣命十玉兔鶻帶十付用安  
其同盟可賜者即賜之辛亥遣張開烏實忻劉益高顯  
率步軍護陳留通許糧道罷貧民進獻糧戊午招鄉導已

未有箭射入宮中書姦臣姓名明日再得之辛酉再括  
京城粟以御史大夫哈昭點檢圖克坦伯嘉等主之丙  
寅括粟使者完顏玖珠以粟有蓬稗杖殺孝婦于省門  
冬十月以前司農卿李煥飛語詔繫左丞李蹊戶部侍  
郎楊慥于獄以軍儲失計坐罪並除名煥遂權戶部尚  
書詔赦殘欠糧其應以糧事繫者皆釋之詔徵諸道軍  
期以十二月一日入援以汪世顯為鞏昌便宜總帥

續據

通鑑綱目補輯

十一月丁未朔賜貧民粥己酉衛州軍校白晝

取豐備倉米壬子京城人相食癸丑詔曹門宋門放士  
民出就食壬戌詔諸將入議事兗王用安率兵至徐州  
元帥王德全閉城不納會劉安國與宿帥重僧努引兵入  
援至臨渙用安使人刼殺之攻徐州久不下退保漣水  
制使因世英以用安不赴援還至宿州遇元兵死之丙  
寅興寶軍節度使趙偉襲據陝州殺行省阿布答努色  
爾等誣以叛帝知其寃不能直授偉元帥左監軍兼西  
安軍節度使行總帥府事偉尋叛降于元十二月丙子

以事勢危急詔議親出乙酉除扈從及留守京城官以  
薩布博索恩楚李蹊圖克坦拜扎等率諸軍扈從參知  
政事兼樞密院使完顏納紳樞密副使兼知開封府薩  
尼雅布裏城四面都總領完顏珠赫外城東面元帥博  
斯呼南面元帥珠嘉耀珠西面元帥崔立北面元帥富  
珠哩邁努等留守權魏璠為翰林修撰如鄧州招武仙  
入援丁亥帝御端門發府庫及兩府器皿官人衣服賜  
將士戊戌官努阿里略謀立荆王不果置不問庚子帝

發南京與太后皇后諸妃別大慟行次公主苑太后遣  
中官持米肉徧犒軍士辛丑至開陽門外麾百官使退  
詔諭戍兵曰社稷宗廟在此汝等壯士也毋以不豫進  
發之數便謂無功若保守無虞將來功賞豈在戰士下  
衆皆灑泣會鞏昌元帥完顏呼沙呼至自金昌為帝言  
京西三百里之間無井竈不可往乃決議東行以呼沙  
呼為尚書右丞遂次陳留壬寅次杞縣癸卯次黃城丞  
相完顏薩布之子安春有罪伏誅甲辰次黃陵峒乙巳

諸將請幸河朔從之

二年春正月丙午朔濟河北風大作後軍不克濟元兵  
追擊于南岫元帥完顏珠爾賀德喜赫舍哩額琳等死  
之建威都尉完顏額埒春叛降于元已酉帝哭祭戰死  
士于河北岫皆贈官斬額埒春二弟以徇赦河朔招集  
兵糧議取衛州元帥富察官努將忠孝軍千人東面元  
帥高顯果毅都尉鈕祜祿耀珠領軍萬人為前鋒至蒲  
城唐成帝次漚麻岡平章政事博索元帥哈薩喇烏達

布繼至辛亥博索攻衛州不克乙卯聞元兵渡河而北  
至衛州之西南遂退師丁巳戰于白公廟博索敗績棄  
軍東遁元帥劉益上黨公張開走死戊午帝進次蒲城  
復還魏樓村李辛自汴京出奔伏誅己未帝以博索敗  
棄六軍與副元帥和爾和六七人夜渡河走歸德庚申  
諸軍知帝已棄軍出走遂大潰辛酉司農大卿富察世  
達元帥完顏呼圖自歸德西門奉迎帝入於歸德遣奉  
御珠嘉塔克寶布后弟圖克坦肆喜往汴京奉迎兩宮



博索還自蒲城聚兵于大橋不敢入壬戌召之至親數其罪下獄籍其家財以賜將士人予金一兩博索及其子呼圖哩皆死獄中以右丞完顏呼沙呼行省事于徐州官努再請率兵北渡紐勒歡不可遣歸德知府行戶部尚書富察世達都轉運使張俊民如陳蔡取糧以元帥李琦王璧護之戊辰京城西面元帥崔立與其黨韓鐸藥安國等作亂殺完顏納紳完顏薩尼雅布勒兵入見太后乃遣韓鐸以太后命名衛王子從恪封為梁王

監國立自稱左丞相都元帥增羣臣爵位有差凡除拜  
皆以監國為辭開封判官李禹翼棄官去戶部主事鄭著  
名不起右副點檢溫都阿里左右司員外郎聶天驥御  
史大夫費摩阿固岱諫議大夫左右司郎中烏克遜納  
紳左副點檢完顏阿薩爾奉御莽格講議富察琦並死  
之立遂送款于元軍癸酉元將蘇布特進兵汴京甲戌  
立閱隨駕官屬軍民子女于省署禁民間嫁娶括京城財  
是時兩宮值變不果行塔克實布以其父耀珠肆喜以

其妻奪門而出至歸德帝驚問兩宮何如二人奏京城軍變不得出帝曰汝妻汝父獨得出即怒斬之乙亥遣提點近侍局事伊喇寧古如徐州相地形察倉庫虛實白華如鄧州召兵二月丙子朔魚山總領張獻殺元帥完顏呼圖懃尋為從宜嚴祿所誅括歸德城中糧留元帥官努忠孝軍四百五十人都尉馬用軍二百八十餘人餘發赴宿徐陳三州就糧三月乙丑知歸德府權參知政事實嘉鈞勒歡乞盡散衛兵出城就食努私與國

用安謀邀帝幸海州不從蔡帥烏庫哩鎬以糧四百餘斛至歸德表請臨幸帝從之遣學士烏庫哩布希諭蔡州人戊辰官努以忠孝軍作亂攻殺馬用及尚書左丞李蹊權參知政事實嘉鈕勒歡點檢圖克坦長樂及從官三百餘人帝赦官努暴鈕勒歡罪狀以官努為樞密副使辛未授官努參知政事兼左都元帥官努徙帝居照碧堂禁諸臣毋入奏對帝歎曰自來姑息之仁遠足以誤事且恨朕不知用人致為此輩所困耳遂與內局

令宋珪等謀誅之夏四月壬午徐州行省完顏呼沙呼  
執王德全並其子誅之及其黨王琳楊瓚錫默延壽台  
經歷商瑀用之魚山從宜嚴祿叛歸漣水庚寅陳州都  
尉李順爾殺行省鈕祜祿納紳及招撫使劉天起送款  
于崔立張俊民李琦奔汴京王壁還歸德癸巳崔立以  
梁王從恪荆王守純及諸宗室男女五百餘人至青城  
皆及于難甲辰鄧州節度使伊喇瑗以城叛既而亡入  
于宋六月己卯官努及其黨阿里哈博濟皆伏誅帝御

雙門赦忠孝軍以安反側以范陳僧王善爾為元帥統  
領之遂決策遷蔡詔蔡息陳潁各以兵來迂中京留守  
烏凌阿呼圖棄城奔蔡壬午中京陷留守強伸死之戊  
子召徐州行省完顏呼沙呼赴行在所以穆延烏登代  
行省事郭恩為總帥兼節度使辛卯帝發歸德留元帥  
王壁守之壬辰次亳州避雨雙溝寺中見艾蒿滿目無  
一人跡喟然嘆曰生靈盡矣癸巳命亳州節度使王進  
同知節度使王賓徵民丁運鐵甲糗糧留權參政張天

綱董之臨淄郡王王義深據靈壁望口寨以叛遣近侍直長鈕祐祿溫綽將徐宿兵討之義深敗走入宋丙申

亳州鎮防軍崔富格殺守臣王賓等張天綱以便宜授

富格節度使罷運鐵甲糗糧州人乃安己亥帝入蔡州

百姓迎者千人拜伏道左帝令近侍諭以朕實自慙令

汝等塗炭汝等無忘祖宗之德衆皆泣下

按哀宗避兩雙溝寺及入

蔡時其愛民之意雖勢極倉猝而舉念不忘金史俱失載茲從弘簡錄補入

召武仙會兵入

援徐州行省穆延烏登赴蔡州起復致仕薩布代行省

事秋七月癸卯朔曲赦蔡州管内雜犯死罪以下弛門  
禁通衆貨蔡人便之乙巳以烏庫哩鎬為御史大夫總  
帥如故張天綱為御史中丞仍權參政完顏藥師為鎮  
南軍節度使兼蔡州管内觀察使戊申烏庫哩布希兼  
息州刺史權元帥右都監行帥府事羅索簽樞密院事  
己酉選室女備宮中使令已得數人以右丞呼沙呼諫  
留識文義者一人餘聽自便乙卯遣魏璠徵武仙兵丁  
己護衛布希舒嚕負祖宗御容至自汴敕有司奉安于



乾元寺前御史大夫富察世達東面元帥博斯呼自汴  
來歸辛酉武仙叔將士謀取宋金州行至浙水衆潰行  
六部尚書盧芝侍郎石玠奔歸蔡州仙追殺玠芝遁去  
丁卯定進馬遷賞格西山帥臣范真姬汝作等各以馬  
進凡得千餘匹以穆延烏登領之遣使分詣諸道選兵  
會于蔡得精銳萬人軍威稍振己巳以富察世達為吏  
部侍郎權行六部尚書八月癸酉朔以秦州元帥鈕祐  
祿烏展權參知政事行省事于陝西諭以蠟書期九月

中徵兵與帝會于饒風關欲出宋不意以取興元甲戌  
元王楫使宋還宋以軍護之帝聞之懼丁丑帝閱兵于  
見山亭乙酉元召宋兵攻唐州元帥右監軍烏庫哩黑  
漢死于戰主帥富察某為部兵所食城破宋人求食人  
者盡戮之宋人駐兵息州南丙戌詔權參政穆延烏登  
簽樞密院事羅索行省院于息州丁亥烏庫哩鎬權參  
知政事烏凌阿呼圖為殿前都點檢庚寅初設四隅機  
察官壬辰息州行省穆延烏登襲宋人于中渡店斬獲

甚衆乙未萬年節州郡以表來賀二十餘所九月癸卯朔命蔡州都軍內族阿魯岱使宋借糧帝諭之曰宋人負朕深矣朕自即位以來戒飭邊將毋犯南界邊臣有請征討者未嘗不切責之向得宋一州隨即付與近淮陰來歸彼多以金幣為贖朕若受財是貸之也付之全城秋毫不計清口臨陣生獲數千人悉以資糧遺之今乘我疲敝據我壽州誘我鄧州又攻我唐州彼為謀亦淺矣元滅國四十以及西夏夏亡及于我我亡必及于

宋昏亡齒寒自然之理若與我連和所以為我亦為彼也卿其以此曉之至宋宋不許時諸帥多擁兵自固戊申魯山元帥元志冒險數百里率兵入援升為總帥庚戌以重九拜天子節度使廳羣臣陪從成禮帝諭之曰國家自開創涵養汝等百有餘年汝等或以先世立功或以勞効起身被堅執銳積有年矣今當厄運與朕同患可謂忠矣比聞元兵將至正汝等立功報國之秋縱死王事不失為忠孝之鬼往者汝等立功常慮不為朝

廷所知今日臨敵朕親見之矣汝等勉之因賜卮酒  
未竟邏騎馳奏元兵數百突至城下將士踴躍請戰是  
日分軍防守以總帥富珠哩羅索守東面內族承麟副  
之烏庫哩鎬守南面元志副之烏凌阿呼圖守西面忠  
孝軍元帥蔡巴爾副之權殿前右副點檢王善爾守北  
面元帥赫舍哩柏壽副之殿前右衛將軍鈕祜祿溫綽  
守東南元帥左都監瓜爾佳當格副之殿前右衛將軍  
內族色埒默守子城都尉王愛實副之辛亥元兵築長

壘圍蔡城已未括蔡城粟冬十月戊寅更造天興寶辛  
已縱飢民老稚羸疾者出城癸未徐州守臣郭恩叛行  
省薩布死之甲申給飢民船聽採城壕芟艾水草以食  
戊子徵諸道兵辛卯帝閱射于子城中者賞賚有差丙  
申殿前左副都點檢溫都察遜戰歿戊戌賜義軍戰歿  
被創者麥十一月辛丑朔以右副都點檢珠勒根伊實  
拉為宣差鎮撫都彈壓別設彈壓四員副之四隅機察  
亦隸焉宋遣將江海孟珙率兵萬人運糧三十萬石助

元攻蔡十二月甲戌盡籍民丁防守拈婦人壯健者假  
男子衣冠運大石帝親出撫軍丁丑元兵決練江宋兵  
決柴潭入汝水巳卯元兵破外城宿州副總帥高拉格  
戰歿辛巳以都尉完顏承麟為東面元帥權總帥巳丑  
元兵逼西城帝謂侍臣曰我為金紫十年太子十年人  
主十年自知無大過惡所恨者祖宗傳祚百年至我而  
絕與自古荒淫暴亂之君等為亡國獨此為介介爾又  
曰古無不亡之國亡國之君往往為人囚繫或為俘獻

或辱于階庭閉之空谷朕必不至于此卿等觀之朕志  
決矣都尉王愛實戰歿砲軍總帥王銳殺元帥瓜爾佳  
當格以衆叛降于元庚寅以御用器皿賞戰士甲午帝  
徵服率兵夜出東城謀突圍他去及柵不果而還乙未  
殺尚廐馬五十匹官馬一百五十匹犒將士

三年春正月甲辰以近侍分守四城戊申夜帝集百官  
傳位于東面元帥承麟承麟固辭帝曰朕所以付卿者  
豈得已哉以肌體肥重不便鞍馬馳突卿平日趨捷有



將畧萬一得免可圖恢復此朕志也已酉承麟即皇帝  
位百官稱賀禮畢亟出捍禦而南面已立宋幟俄頃四  
面呼聲震天地元兵入自南門與城中軍巷戰城中軍  
不能支帝自縊于幽蘭軒時呼沙呼富珠哩小羅索烏  
凌阿呼圖元志王善爾赫舍哩柏壽烏庫哩和勒端及  
軍士五百餘人皆從死焉

按諸從死人姓名金史未載茲據續通鑑綱目補輯末

帝退保子城間帝崩率羣臣入哭謚曰哀宗哭奠未畢  
城潰奉御經實瘞之汝水上末帝為亂兵所害金亡

哀宗正大八年天興三年凡十一年

右金九主合一百二十年



欽定續通志卷五十六